



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu imprensa

25 Setembru 2013

Tribunál Distrital Suai

Arguidu ba kazu inestu hetan pena tinan 8 prizaun

Iha 20 Setembru 2013 Tribunál Distritál Suai prezide julgamentu leitura akordaun ba krime inestu no kondena arguidu ba tinan 8 iha prizaun tanba provadu komete violasaun seksuál agravadu hasoru nia subrinha rasik.

Ministériu Públiku akuza katak arguidu prátika violasaun seksuál agravadu dala sanulu hasoru lezada iha fulan Jullu 2010 nia laran. Durante iha kalan boot arguidu sempre tama bebeik ba lezada nia kuartu laran ho ameasa no obriga hodi halo relasaun seksuál ho lezada kauza lezada hetan isin rua.

“JSMP hanoin katak inestu nu’udar krime ne’ebé sériu tebes tanba arguidu sira mak membru familia ne’ebé mak besik liu ho lezada. Tanba ne’e, JSMP husu ba Ministériu Públiku atu aseguza katak akuzasaun hotu-hotu tenke konsidera elementu sira ne’ebé asosiadu iha krime ne’e tanba krime ne’e nu’udar krime kontinuada no loloos tenke konjuga ho artigu 41 Kódigo Penál, tanba arguidu komete krime hanesan to’o dala sanolu iha kalan diferente”, dehan Luis de Oliveira Sampaio Direitór Ezekutivu JSMP.

JSMP observa katak krime inestu kontinua akontese iha fatin hotu-hotu iha Timor-Leste. JSMP fiar katak númeru ne’e reprezenta deit realidade kiik liu husi prevelensia inestu iha Timor Leste. Tanba ne’e, JSMP ezije Estadu atu hola asaun no medida konkreta atu hapara inestu iha Timor Leste no proteze sira ne’ebé sai vítima.

Antes ne’e iha 18 Setembru 2013, Tribunál Distritál Baucau kondena arguidu ba kazu inestu ho pena prizaun tinan 18. JSMP hanoin katak pena ne’e ekilíbru liu kompara ho kazu ida ne’e. JSMP enkoraza autór judisiáriu sira atu konsidera profundamente elementu krimnál sira ne’ebé asosiadu iha krime ne’e, nune’e bele produz rezultadu ida ne’ebé refleta krime nia gravidade no satisfas interese justisa ba kazu ne’e.

Ministériu Públiku akuza arguidu kontra artigu 172 ho 173 alinea (d) Kódigu Penál kona-ba agravasaun, konjuga ho artigu 35 Lei Kontra Violénsia Doméstika.

Iha audiência julgamentu arguidu konfesa ba tribunál katak akuzasaun loos hotu no lezada deklara katak faktu sira ne'e loos.

Kazu ne'e julga ho Número Prosesu: 154/2013/TDS. Julgamentu leitura ba akordaun ne'e representante husi Juis kolektivu Dr. Costancio Barros Basmary, Ministériu Públiku representa husi Dr. Felismino Araújo, Dra. Benvinda do Rosario no arguidu hetan defeza husi Dr. Marçal Mascarenhas husi Eskritóriu Defensór Públiku. Ofisiál Justisa ne'ebé toma konta ba prosesu ne'e mak Sr. Trensio Abel.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl